

Filifiliina o le Alāata

*Ae faapefea pe a na le toe manao
Brooke e ave a ma uo a Kamila?*



**Saunia e Shannon Tuttle
Liechty**

(E faavae i se tala moni)

“E puipui mai le Atua; ia oe!” (Viiga, nu. 148)

“Sa ou vaaia le faaaliga sili ona malie
Sananafi. E tatau ona e siakiina. Atonu e
mafai ona ta matamata faatasi ai i se taimi!”
Na fai atu ai Brooke.

Sa fiafia lava pea Kamila e talanoa ma
lana uo mamae a o la savavali faatasi atu i
le fale mai le aoga. Sa ia fiafia lava i le tele o
mea la te tutusa ai.

“Manaia tele!” Sa faatofa atu Kamila ma
savali atu i lona faitotoa pito i luma.

Ina ua mae’a le meaogaa a Kamila, sa ia
kiina le televise ma maua ai le faaaliga sao.
O le a malie tele le talanoa e uiga i ai ma
Brooke taeao!

O le faaaliga sa mālie. Na faia e tagata ni
mea malie ma fai atu ni tala tausua. Sa tele
ina ata Kamila. Ae e le o mea uma na latou
fai mai ai na malie. Sa latou fai mai ni upu
na mafua ai ona faalogoina e Kamila e pei o
loo osooso ni lane i lona manava. E le o ni
upu lelei.

*O le a se mea e tatau
ona ou faia? sa ia
mafaufau ai. Sa iloa
e Kamila o nei upu
sa le lelei. Ae sa ia fia
iloa pe na faapefea le
faaiuga o le faaaliga. O le
a sana tala e fai pe a fesili
mai Brooke ia te ia i le aso a
taeao?*

Faatasi ai ma se mapuea, na tapē ai e
Kamila le televise.

Ina ua taunuu atu tina i le fale, sa fesoasoani
Kamila ia te ia e tapena le laulau mo

le taumafataga o le afiafi. “Na faapefea mai le aoga?”
O le fesili lea a tina.

Sa tuu atu e Kamila ia tui ma sipuni. “Sa matuai
manaia lava! Vagana . . . Sa tau mai e Brooke ia te au
se faaaliga e matamata. Sa amata ona ou matamata ai,
ae na i ai upu leaga. E lei lelei ni ou lagona e uiga i ai,
o lea na ou tapeina ai.”

“E foliga mai sa e faia se filifiliga lelei tele.”

“Ae o loo manao Brooke e matamata faatasi i ai. O
ma’ua o se uo mamae! E tutusa musika ma te fiafia i ai,
o le aisa kulimi e tasi, o tusi lava e tasi . . .”

Sa tuu e tina se ipu o makaroni i luga o le laulau.
“E moni, ae e le faapea e tatau lava ona e faia na mea
uma e tasi. Aemaise pe afai o se mea e te le o maua ai
se lagona lelei. E le afaina le faia o ni filifiliga e ese mai
nai lo filifiliga e faia e se uo.”

“O le a le uiga o lau tala?” Na fesili ai Kamila.

“Ia, ua tatou filifili e aloese mai upu leaga ina ia
mafai ona tatou lagona ai le Agaga Paia,” na faama-
lamalama atu e tina. “Ae e le o tagata uma e tutusa o
latou tulaga faatonuina e pei ona tatou faia. E le faia
lena e ave ai i latou ma ni tagata leaga.”

Sa popole pea Kamila i le mea e ono tupu pe a fesili
atu Brooke ia te ia e uiga i le faaaliga. Sa la talanoa e
uiga i mea uma! Ae faapefea pe a manatu Brooke o ia
o se pepe? Pe sili atu ona leaga, ae faapefea pe a le toe
fia faauo o ia?

Sa fai e Kamila se tatalo a o lei alu e moe. *Tama
Faalelagi, faamolemole fesoasoani mai ia te au e tala-
noa ia Brooke taeao. Faamolemole fesoasoani mai ia
ou lototele.* Na a’e Kamila i lona moega ma faamoemoe
o le a lelei mea uma i le aoga.

“Kamila!” Sa ee atu ai Brooke i le isi itu o le
malae. Sa ia tamoe i luga o le mutia e faafetaiai
ia Kamila. “O le a sou manatu i le faaaliga? Sa le
malie ea?”

Sa manavanava loloa Kamila. “Sa le’i tele moni
lava se vaega sa ou matamata ai.”

Sa foliga le mautonu Brooke. “Aisea?”

Sa mafaufau Kamila mo sina sekone. Pe na te fai
atu ea sa ia pisi? O le a le tala a Brooke o le a fai?
“Ia . . . ou te lei matamata i ai ona sa latou fai mai ni
upu ou te lei fiafia ai. Sa le lelei ni o’u faalogona i le
matamata i ai.”

“Oi,” na fai atu lemu ai Brooke. Ona ia fai mai lea,
“E le afaina. Ta te le tau matamataina faatasi. E mafai
ona ta sueina se faaaliga ta te fiafia uma i ai pe faia
faatasi se isi mea.”

“Ua lelei.” Sa ataata Kamila. Ona savavali faatasi
lea o nei uo e toalua i le vasega, ma talanoa ma talie
i le taimi atoa. ●

E alala le tusitala i Iuta, ISA.



E mafai ona e filifili le mea sao e tusa
lava pe e le faia e isi. O le a fesoasoani
le Tama Faalelagi ia te oe ia malosi.